

Sutkinja Suda BiH osuđena na zatvorsku kaznu

Sud Bosne i Hercegovine (BiH) osudio je sutkinju ovog suda Azru Miletić jer je uzela novac kako bi omogućila donošenje povoljnije presude za bivšeg policijskog komesara Unsko-sanskog kantona Ramu Brkića i Senada Šabića. Miletić je bila predsjedavajuća Žalbenog vijeća Suda BiH pred kojim se Brkiću i Šabiću sudilo zbog proizvodnje i trgovine drogom te davanja i primanja dara.

Sutkinja Miletić i bivši komesar Brkić se izjasnili da nisu krivi

Prema presudi, zaštićeni svjedok je stupio u kontakt sa optuženim Šabićem, a nakon toga ponudio sutkinji Miletić novac kako bi on i Brkić bili oslobođeni ili dobili manju zatvorsku kaznu. Miletić je prihvatila obećani dar, a zatim i uzela najmanje 3.000 eura.

Svjedok posrednik je od Šabića uzeo ukupno 48.500 eura. Mali dio novca je dao sutkinji, a ostatak zadržao za sebe. Miletić je tim novcem trebala otplatiti stan u Tuzli. Nakon što je svjedok počeo izbjegavati, kako se navodi u presudi, Miletić je zvala i člana njegove porodice i zahtijevala obećani novac.

Sud BiH 2013. godine je osudio Brkića na jedanaest godina zatvora zbog zloupotrebe položaja, proizvodnje i prodaje droge, te primanja dara. Istom presudom, Šabić je osuđen na deset godina zatvora zbog proizvodnje i prodaje droge, te davanje mita. Ovu presudu Žalbeno vijeće je djelimično ukinulo i odredilo da se suđenje ponovi. Predsjedavajuća Žalbenog vijeća pred kojim se suđenje ponavljalo bila je sutkinja Miletić.

Ponovljeno suđenje je prekinuto u februaru 2015. godine kada

su Brkić, Šabić i Miletić uhapšeni. Nakon toga Brkiću i Šabiću se sudilo pred izmijenjenim sudskim vijećem, koje je u novembru 2015. godine potvrdilo izrečene zatvorske kazne.

Sud BiH osudio je Miletić na dvije godine i šest mjeseci zatvora, te je odredio da treba vratiti 3.000 eura koje je uzela. Ovom presudom zabranjeno joj je da tri godine vrši službenu dužnost.

Istom presudom Miletić je oslobođena krivice da je tokom ponovljenog suđenja Brkiću i Šabiću svjesno kršila zakon tako što nije otklonila povrede prvostepenog postupka.

Na ovu presudu Tužilaštvo i odbrana se mogu žaliti Žalbenom vijeću Suda BiH. Nakon izricanja presude odbrana je najavila da će se žaliti.

Visoko sudsko i tužilačko vijeće (VSTV) je nakon hapšenja suspendovalo Miletić sa pozicije sudije.

Zajedno sa sutkinjom Miletić trebalo se suditi Brkiću i Šabiću, ali se oni nisu odazivali na pozive Suda, nakon čega je Interpol za njima raspisao potjernice.

Centar za istraživačko novinarstvo (CIN) pratio je policijsku akciju u kojoj su Brkić i Šabić uhapšeni za organizirani kriminal kao i suđenje pred Sudom BiH te o tome napravio dokumentarni film.

